

No-Billag – refusa datscherta ed energica

Il cumbat per daners da radio e televisiun cuntinua

■ (anr/vi) **La confederaziun dastga vinavant incassar u laschar incassar taxas da radio e televisiun. Ils votants svizzers segireschan cun il na datschert a No-Billag l'avegnir da la SRG.** La SRG survegn mintg'onn raudund 1240 milliuns francs. Ils passa 30 emetturs privats, sco per exempel Radio Südostschweiz, survegnan ensemen 60 milliuns da la petta da taxas che la confederaziun lascha incassar entras la Billag. Cun la decisiun dad ier resta la cuntrada da medias svizras preservada d'in terratrembel ch'in gea a l'iniziativa avess chaschunà.

Tegnair las empermischuns

Ella haja spetgà quest resultat, di *Natalie Rickli* sin SRF. La cussegliera naziunala da la pps ha sustegnì l'iniziativa ch'ella numna sezza radicala. Malgrà la refusa energica discurra Rickli d'in success per ils iniziants, pertge ils adversaris hajan stuì far bleras concessiuns e bleras empermischuns durant il cumbat da votaziun. Perfin la vice-scheffa da la SRG haja ditg che la SRG saja grassa e stoppia prender giu. Ils votants sa fidian da questas empermischuns ed hajan perquai votà na.

Era per *Hans-Ulrich Bigler* n'è la refusa nagina surpraisa. Il directur dals masternants svizzers pretenda che las empermischuns ch'il cussegl federal e la direcziun da la SRG hajan fatg durant la campagna vegnian uss tegnidas. I dovria in pachet da spargn per il radio e la tele-

visiun publica e la SRG stoppia sortir dad Admeira, il consorzi da reclama cun Ringier e la Swisscom.

«Impedi l'attatga sin la democrazia»

Il pievel svizzer haja refusà cleramain «las fantasias radical-libertaras» dals iniziants da No-Billag, scriva l'Operation Libero en sia comunicaziun. Il resultat rinforzia la cuntrada da medias svizra e la democrazia directa. Darar haja ina votaziun muventà gia uschè ditg avant ils spiert e darar hajan ins senti in tal engaschi en l'entira Svizra. La raschun: I na saja betg mo i per il destin da la SRG, mabain per la dumonda sch'ins giavi-

schia vinavant bunas infurmaziuns e medias fermas.

Ils Svizzers sajan daventads per-tscharts che la multifariadad da las medias saja periclitada entras l'iniziativa, scriva il comitè «Sendeschluss Nein». Ina gronda chasa da medias sco la SRG stoppia vegnir finanziada cun entradas da taxas, uschiglio perdia ella sia independenza. L'engaschi encunter l'iniziativa saja stà enorm, scriva il manader da campagna *Mark Balsiger*. «In engaschament uschè grond n'hai jau mai vis fin uss tar ina votaziun.» Dieschmillis da personas hajan repartì flyers, scrit brevs da lecturs, empruvà da persvader, dà daners u fatg posts sin facebook.

Mo 300 francs per chasada

Betg mo la pps fa squitsch, mabain era parlamentarist verd-liberals e da la pcd pretendan che la SRG sa restrenschia, per exempel cun betg pli far reclama la saira ed en l'internet. Plinavant duai l'interpresa da medias sortir dad Admeira. Oz vul *Beat Vonlanthen* (pcd/FR) inoltrar ina moziun che limitescha la reclama che la SRG dastga far sin ses emetturs. Sco la «SonntagsZeitung» scriva giavischa il cusseglier dals chantuns er in'otra repartiziun da las taxas: Las televisiuns ed ils radios privats duain survegnir dapli daners ed ina part da las taxas duessan las gasettas regiunals obtegnair. Er il president da la pcd

Gerhard Pfister sa lascha citar cun prentensiun: «I dovra ina debatta davart la grondezza ed ils cuntengns da la SRG.»

La pbd vul che las taxas vegnian sbassadas da 365 sin 320 francs l'onn ed inoltescha anc quest'emna in'intervenziun. Sumegliantias prentensiuns vegnan da la pld, dals verd-liberals e verds.

Natalie Rickli e *Gregor Rutz* han gia l'emna passada inoltrà duas iniziativas parlamentaras. Ils dus cussegliers naziunals da la pps giavischan ch'ina chasada sto pajar be pli 300 francs e che las interpresas vegnan liberadas da taxas da radio e televisiun.